

Kirolean abusuaren aurkako protokoloa ezartzeari buruzko

KONTROL MOZIOA

Reyes Carrere Zabalak, EH BILDU udal taldeko zinegotziak, Udalbatzaren Araudi Organikoaren 98. artikulua oinarri, KONTROL MOZIO hau aurkezten du udalbatzan azter dadin. Mozioa 2023ko otsailaren 13an Pertsonen Zerbitzuen Batzordean aztertutako interpelazioaren ondorioa da.

JUSTIFIKAZIOA

EH Bildu udal taldeak 2021eko ekainean aurkeztutako kontrol mozioan, kirolean sexu indarkeriari eta abusuari aurre egiteko neurriak hartu beharri buruzkoan, bigarren puntuan hau eskatzen genuen:

2. Donostiako Udalbatzak hertsiki eskatzen dio Udal Gobernuari lantalde bat abian jar dezala Berdintasun Sailarekin, Donostia Kirolarekin eta Donostiako kirol-erakunde eta kirol klubetako ordezkarekin batera, kirol-arloko sexu indarkeria eta jazarpena prebenitzeko protokolo-eredu bat egiteko, eta eskura dituen udal-baliabideak jar ditzala klubei hura ezartzen laguntzeko.

Harrigarria bada ere, puntua ez zen onartu, Udal Gobernuak osatzen duten bi taldeetako kide guztiek gure proposamenaren aurka bozkatu baitzuten. Hala eta guztiz ere, udal gobernu honek berak erabaki zuen 2022. urteko aurrekontuetan kontu sail berri bat sartzea, udalbatzar hartan proposatu genuen protokolo berbera egiteko.

Gaiaren larritasunaz eta premia jabetuta, iaz hainbat alditan galdetu genuen zer puntutan zegoen lantze-prozesua eta noizko kalkulatu zuten indarrean egon zitekeela. Apirilean, batzordean galdetu ondoren, Gobernuak erantzun zigun Berdintasun Sailetik ari zirela garatzen eta protokoloa hilabete gutxi batzuk geroago amaituta izatea espero zutela, eta 2022-2023 ikasturtean, udazkenean sozializatzen saiatuko zirela. Baina hilabeteak aurrera doaz, 2023ko otsailean gaude, eta oraindik ere ez da behin betiko dokumentua aurkeztu, azarorako Berdintasun Departamentuak protokoloaren zirriborroa bukatua zuen arren.

Horregatik, oraingoan, gobernu honi gogorarazi nahi diogu protokolo hori ahalik eta azkarren kirol esparruan aplikatzea ez dela borondate politikoaren kontua soilik, baizik eta indarrean dagoen araudi esparruaren arabera egitera behartuta dagoela. Izan ere, Haurrak eta Nerabeak Indarkeriatik Babesteko ekainaren 4ko 8/2021 Lege Organikoak (LLOVIPI), kirol eta aisiari buruzkoak, IX Kapituluak, honako hau ezartzen du:

47 Artikulua. Kiroleko eta aisialdiko indarkeriaren aurrean jarduteko protokoloak.

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

Administrazio Publikoek, beren eskumeneren esparruan, kirol-eremuan eta aisialdi-eremuan ingurune segurua eraikitzeko jarduketak bilduko dituzten jarduera-protokoloak arautuko dituzte. Jarduera horiek kirol- eta aisialdi-eremuan haurren eta nerabeen aurka gerta daitezkeen indarkeria-egoerak prebenitzeko, garaiz detektatzeko eta esku hartzeko jarraitu behar dira. Protokolo horiek kirol- eta aisialdi-jarduerak egiten dituzten zentro guztietan aplikatu beharko dira, titulartasuna edo-zein dela ere, eta, betiere, Errendimendu Handiko eta Kirol Teknikazioko Zentroen Sarean, Kirol Federazioetan eta Udal Eskoletan.

Hortaz, Udal Gobernuak ezin du gehiago atzeratu protokolo honen aplikazioa, bi arrazoi hauengatik: bata, garrantzitsuena, haur eta nerabe guztiak kirol-esparruan ematen diren indarkerietatik babesteko erantzukizuna duelako eta horretarako eskura dituen baliabide guztiak erabili behar dituelako, eta bestea, legeak horretara behartzen duelako.

Azken batzordean, gobernuak interpelatu ondoren, jaso genuen erantzuna ondorengoa izan zen: "*Protokolo hori oso aurreratua dago*" eta "*behin betiko protokoloa idatzi eta ezartzeko epeak direla-eta, lan horiek ahalik eta lasterren egingo dira*". Udal Gobernuak ez zuen inongo datarik zehaztu, ordea.

Horiek horrela, behean sinatzen duen zinegotziak honako **KONTROL MOZIO** hau aurkezten du:

- Udalbatzak hertsatuki eskatzen dio Udal Gobernuari bi hilabeteko epean, gehienez ere, kirolean haur eta nerabeen aurkako indarkeriari aurre egiteko prebentzio eta ekintza protokoloaren behin betiko dokumentua aurkez dezala.

Donostian, 2023ko otsailaren 16an

Reyes Carrere Zabala,

EH Bildu udal taldeko zinegotzia.